

Pesta Buku Borneo 2024 usaha awal suntik minat membaca

UB 20.11.2024 P.03

KOTA KINABALU: Kejayaan penganjuran Pesta Buku Borneo (PBB) 2024 di Sabah International Convention Centre (SICC) Kota Kinabalu baru-baru ini menjadi usaha awal menyuntik minat terhadap buku dan bahan bacaan dalam kalangan masyarakat khususnya di Borneo.

Dengan tema 'Borneo Membaca', pesta buku yang dianjurkan buat kali keenam itu melibatkan 90 reruai yang disertai penerbit universiti awam ahli Majlis Penerbitan Ilmiah Malaysia (MAPIM), Perpustakaan Negeri Sabah, Dewan Bahasa dan Pustaka, penerbit swasta, pengedar buku dan penerbit antara-bangsa.

Naib Canselor Universiti Malaysia Sabah, Prof. Datuk Dr. Kasim Hj. Mansor, berkata adalah menjadi hasrat agar pesta buku itu menjadi antara aktiviti utama dalam kalangan masyarakat suatu masa nanti.

"Bagaimanapun, usaha memupuk minat membaca harus dilaksana terlebih dahulu, dan caranya adalah



TERBAIK: Kasim dan Hanafiah meninjau salah satu reruai yang menjual buku.

dengan menawarkan bahan bacaan bermutu, menarik, tawaran harga yang berpatutan dan pelbagai insentif tertentu.

"Langkah membudayakan amalan membaca tidak lain

adalah untuk meningkatkan tahap pemikiran masyarakat kita agar setaraf dengan pemikiran masyarakat di negara maju yang sentiasa ke depan," katanya ketika berucap pada majlis perasmian

program tersebut.

Beliau turut berharap agar pihak kerajaan dapat memberikan insentif sama ada dari segi prasarana, modal, dan seumpamanya kepada para penerbit tempatan bagi

membolehkan penerbit dapat berkembang maju dan meluaskan pasaran dalam usaha menyokong budaya membaca.

Sementara itu, Setiausaha Tetap Kementerian Sains, Teknologi dan Inovasi (KSTI) Sabah, Datuk Mohd Hanafiah Mohd Kassim ketika mewakili Menteri KSTI, Datuk Dr. Haji Mohd Arifin Datuk Haji Mohd Arif merasmikan pesta buku tersebut berkata, penganjuran PBB adalah bertepatan dengan hasrat untuk memartabatkan amalan membaca dan berharap agar penganjuran PBB akan sentiasa dinantikan.

"Budaya membaca perlu disuburkan agar masyarakat tidak ketinggalan dalam arus maklumat dan pengetahuan semasa.

"Bagi meluaskan pasaran dan memudahkan akses pembelian buku, dicadangkan agar UMS dijadikan sebagai pusat edaran buku bagi penerbit dan pengedar di luar kawasan Sabah sebagai langkah membantu membudayakan minat membaca," katanya.